

Հավելված

ՀՀ կառավարության 2010 թվականի  
դեկտեմբերի 30-ի N 1758 -Ն որոշման

ՀԱՐԿ ՎՃԱՐՈՂՆԵՐԻՆ ՌԻՍԿԱՅԻՆ ՀԱՄԱՐԵԼՈՒ ՉԱՓԱՆԻՇՆԵՐ`  
ՕՐԵՆՔՈՎ ՍԱՀՄԱՆՎԱԾ ՉԱՓՈՎ ԵՎ ԿԱՐԳՈՎ ՈՐՈՇՎՈՂ` ՀԱՐԿ  
ՎՃԱՐՈՂԻ ԱՅԼ ՀԱՐԿԱՅԻՆ ՊԱՐՏԱՎՈՐՈՒԹՅՈՒՆՆԵՐԻ ԴԻՄԱՑ  
ՀԱՇՎԱՆՑՄԱՆ ԵՎ (ԿԱՄ) ՎԵՐԱԴԱՐՁՄԱՆ ԵՆԹԱԿԱ ԱՎԵԼԱՑՎԱԾ  
ԱՐԺԵՔԻ ՀԱՐԿԻ ԵՎ (ԿԱՄ) ԱԿՑԻՉԱՅԻՆ ՀԱՐԿԻ ԳՈՒՄԱՐՆԵՐՆ  
ԱՌԱՆՑ ՈՒՍՈՒՄՆԱՍԻՐՈՒԹՅԱՆ ՀԱՇՎԱՆՑԵԼՈՒ ԵՎ (ԿԱՄ)  
ՎԵՐԱԴԱՐՁՆԵԼՈՒ ՀԱՄԱՐ

1. Օրենքով սահմանված չափով և կարգով որոշվող` հարկ վճարողի այլ հարկային պարտավորությունների դիմաց հաշվանցման և (կամ) վերադարձման ենթակա ավելացված արժեքի հարկի և (կամ) ակցիզային հարկի գումարներն առանց ուսումնասիրության հաշվանցելու և (կամ) վերադարձնելու առումով հարկ վճարողներին ռիսկային համարելու չափանիշներն են`

1) հարկ վճարողը համարվում է ավելացված արժեքի հարկ վճարող` հաշվետու ժամանակաշրջանին նախորդող մեկ տարուց պակաս ժամանակահատվածում.

2) հաշվետու ժամանակաշրջանին նախորդող մեկ տարվա ընթացքում որևէ հաշվետու ժամանակաշրջանում գործարք չի իրականացրել.

3) ավելացված արժեքի հարկի և (կամ) ակցիզային հարկի հաշվանցումները և (կամ) վերադարձները հաշվետու ժամանակաշրջանին նախորդող 12-ամսյա ժամանակահատվածում հարկ վճարողի մոտ կատարվել են առանց ուսումնասիրության կամ ստուգման.

4) հաշվետու ժամանակաշրջանին նախորդող մեկ տարվա ընթացքում անցկացված հարկային հաշվանցումների և (կամ) վերադարձման ուսումնասիրությամբ կամ ստուգմամբ կամ Հայաստանի Հանրապետության պետական բյուջեի հետ փոխհարաբերությունների ստուգմամբ հիմնավորված չի համարվել հարկ վճարողի դիմումով հաշվանցման և (կամ) վերադարձման ներկայացված գումարի 20 և ավելի տոկոսը.

5) հաշվետու ժամանակաշրջանին նախորդող 18-ամսյա ժամանակաշրջանի ընթացքում հարկ վճարողի մոտ անցկացված հարկային հաշվանցումների և (կամ) վերադարձման ուսումնասիրությամբ կամ ստուգմամբ կամ Հայաստանի Հանրապետության պետական բյուջեի հետ փոխհարաբերությունների ստուգմամբ «Հարկերի մասին» Հայաստանի Հանրապետության օրենքի 27-րդ հոդվածին կամ «Ավելացված արժեքի հարկի մասին» Հայաստանի Հանրապետության օրենքի 43-րդ հոդվածին համապատասխան առաջադրված հարկի գումարի մեծությունը կազմել է ուսումնասիրվող կամ ստուգմամբ ընդգրկված ժամանակաշրջանի համար հարկ վճարողի կողմից ներկայացված՝ համապատասխան հարկատեսակի հաշվարկներով Հայաստանի Հանրապետության պետական բյուջե վճարման ենթակա հարկի գումարի 10 և ավելի տոկոսը.

6) հաշվետու ժամանակաշրջանին նախորդող 36-ամսյա ժամանակաշրջանի ընթացքում հարկ վճարողի նկատմամբ կիրառվել է «Հարկերի մասին» Հայաստանի Հանրապետության օրենքի 31-րդ հոդվածով սահմանված տուգանքը.

7) հարկ վճարողի դիմումի համաձայն առանց ուսումնասիրության կամ ստուգում իրականացնելու օրենքով սահմանված կարգով որոշվող գումարը գերազանցող գումարով հաշվանցում և (կամ) վերադարձ կատարելու համար հարկ վճարողի նկատմամբ հաշվետու ժամանակաշրջանին նախորդող 18-ամսյա ժամանակաշրջանի ընթացքում կիրառվել է «Հարկերի մասին» Հայաստանի Հանրապետության օրենքի 27-րդ հոդվածով սահմանված տուգանքը.

8) հարկ վճարողի կողմից հաշվանցման և (կամ) վերադարձման ներկայացված գումարը պակաս է դիմումը ներկայացնելու օրվա դրությամբ ունեցած՝ հարկային մարմնի միջոցով Հայաստանի Հանրապետության պետական բյուջե հավաքագրվող հարկատեսակների մասով չկատարված հարկային պարտավորությունների գումարից.

9) հարկ վճարողի դիմումով հաշվանցման և (կամ) վերադարձման ներկայացված գումարը գերազանցում է նույն ժամանակաշրջանի ավելացված արժեքի հարկի հաշվարկում

նշված՝ ավելացված արժեքի հարկի զրոյական դրույքաչափով հարկվող գործարքների շրջանառության 20 տոկոսը.

10) հաշվետու ժամանակաշրջանին նախորդող 18-ամսյա ժամանակաշրջանում ներկայացված ավելացված արժեքի հարկի ճշգրտված հաշվարկների թիվը գերազանցել է 3-ը, բացառությամբ այն դեպքերի, երբ ճշգրտված հաշվարկները ներկայացնելու պահանջ սահմանված է Հայաստանի Հանրապետության կառավարության որոշմամբ.

11) հարկային մարմնի կողմից մշակված՝ ռիսկերի կառավարման և ստուգման ենթակա հարկ վճարողների ընտրության ավտոմատացված համակարգի միջոցով հարկ վճարող ճանաչվել է որպես ստուգման ենթակա:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ  
ՂԵԿԱՎԱՐ

Դ. ՍԱՐԳՍՅԱՆ